

LA USC DI LADINS – VENERDI' 6 SETTEMBRE 2019

EVENC

Dolomites te piaz

Per i 10 egn de Dolomites Unesco l'è stat metù fora te Piaz de Comun de Sèn Jan na bela esposizion de retrac de monts che tol ite duc i 9 sistemes che fèsc pèrt de la Fondazion

L'è na esposizion maraveousa e particolèra, chela che se pel veder amò fin a la fin de setember te Piaz dedant a la Cèsa de Comun de Sèn Jan: na scempia strutura de legn a foja de cadrat olache l'è stat metù fora 9 gran reproduzioni di più bie panorames de la Dolomites.

La mostra, che à per titol Leames Dolomitics l'è l frut del lurier e de la braùra de 9 fotografes, che vegn da vigniun di 9 sistemes che fèsc pèrt de Dolomites Unesco e che à sport i più bie retrac de crepes desche don per n cedeàn emportant: i 10 egn da l'emportant recognosciment.

La valorisazion de la mont, chest gran patrimoniè che l'è l fondament de nosc turism e de noscia economia, l'è semper zentrèl te anter i evenc

da d'istà del Comun de Sèn Jan e del Comitat Manifestazions de Poza, che da egn l met a jir na lingia de scontrèdes, vigni lunesc te Cèsa de Comun, che à per argoment noscia crepes te si desferenc aspec e che vegn coordinèdes con braùra da la giornalista e pascionèda de mont Virna Pierobon.

Chest istà no podea esser vida miora per serèr sù la lingia de evenc che se fèr na bela viva per l cedeàn: en lunesc ai 2 de setember l'apuntament é peà via donca jà da les 6 da sera, canche te piaz la diretora de la Fondazion Dolomites Unesco Marcella Morandini, l'assessor a la cultura del Comun de Sèn Jan Simone Zulian, la presidenta del Comitat

Manifestazions de Poza Mara Dorich, la giornalista Virna Pierobon e l fotograf Anton Sessa i à prejentà a duta la jent la bela esposizion te piaz.

Te chisc 10 egn l numer de jent che va sa mont te la Dolomites se à smaorà del 10%, à dit la diretora Morandini, che é stata dapò protagonista enche de la scontrèda dò cena, semper dedichèda a la Fondazion, che à vedù la prejenza e i intervenc emportanc del vizepresident de la PAT, che te pech temp doventarà president de la Fondazion ajache l testamonech passarà apontin al Trentin.

Per chel che vèrda la mostra i bie retrac de Alessandro Caon, Moreno Geremetta, Eliza Lazzari,

Nicolò Miana, Patrick Odorizzi, Franco Oliveri, Andreas Tamanini, Georg Tappeiner e l fotograf »de cèsa«, Anton Sessa, i é metui fora a na vida che se pel i veder da dut entorn, ma enche jir ite per se sentir te mez al braciacol de nosc ambient maraveous. E a fèr dut amò più

sugestif, canche se auza i eies se veit entornvia i crepes reèi.

La esposizion, che vegn veduda ogne di da n muion de jent, enche chi che no ruassa apede te na sala daite, resta da poder veder enschin a la fin de setember. LG



Virna Pierobon, Marcella Morandini e Simone Zulian te Piaz de Comun de Sèn Jan per la prejentazion de la mostra Dolomites Unesco.